

الأنبياء الصغار

سفر هوشع

محبة الله لنا لا تسقط أبداً

مهما كنّا في أبعد و أسوأ حالاتنا، في شر و فساد و رياء و عدم توبة و خطية متأصلة في القلب ... محبة ربنا لنا بتغلب كل ده ... بيدور على كل واحد فينا زي الأب الطيب لابنه العنيد و الزوج الوفي لزوجته الخائنة ... و لنا رجاء في دم المسيح بالتوبة و الرجوع من تاني لحضن ربنا

؟
ليه ندرس عهد قديم؟

"فتشوا الكتب لأنكم تظنون أن لكم فيها حياة أبدية. وهي التي تشهد لي"

وصية واضحة من ربنا لدراسة العهد القديم (تلتين الكتاب المقدس) ...

1. مانقدرش نستوعب العهد الجديد صح غير من خلال نبوات و أحداث العهد القديم
2. ربنا هو هو أمس و اليوم ... و كذلك الإنسان ... العهد القديم غني جداً في شرح معاملات ربنا مع الإنسان بطريقة تخلينا نفهم ربنا
3. الكلام ده اتكتب عشاننا (الوعود و الوصايا لا تتغير) ... ربنا كمل لنا (لم آت لأنقض بل لأكمل)

عن الكاتب

معنى الاسم: **الله يخلص** (نفس معنى يسوع و يشوع) ... و السفر فعلاً بيقدم لنا الله المخلص لشعبه

فترة النبوة:

- هوشع من أنبياء قبل السبي.
- عاش في مملكة إسرائيل (مملكة الشمال) بعد حوالي 200 سنة من تقسيم المملكة (لمملكة الشمال إسرائيل و مملكة الجنوب يهوذا، في عهد الملك رحبعام ابن سليمان)
- هوشع النبي عاصر إشعيا النبي ... تنبأ قبل السبي و حضر سبي مملكة الشمال



عن السفر

عدد الإصحاحات: 14

? ظروف الكتابة:


- هوشع تنبأ في عهد واحد من أسوأ ملوك إسرائيل (يربعام الثاني) ... وقتها كان فيه فوضى في المملكة (قبل ما مملكة آشور تسبي إسرائيل سنة 722 ق.م.)
- سفر هوشع بيمثل حوالي 25 سنة من خبرته و كتابته و نبؤاته

👉 **السفر موجّه لمين؟** لمملكة إسرائيل ... لكن بنفهم من آخر آية في السفر إنه الكلام صالح لكل زمان، و بالتالي السفر موجّه لكل إنسان

✅ **هدف السفر:** بيفهّمنا قصد ربنا كأب محب للبشرية عايز ينقذها و يشفيها من الكسر و الخطية اللي فيها

🔑 مفتاح فهم السفر:

- مملكة إسرائيل في الوقت ده كانت بعيدة عن ربنا و فيها خطايا و مظهرية كتير ... لسة مكانتش ضعفت جداً عسكرياً لأنها كانت متوكلّة على آشور و مصر
- ربنا أوّل وصية قالها للشعب: "تحب الرب إلهك من كل قلبك و فكرك و قدرتك. لا يكون لك آلهة أخرى أمامي" ... كسر الوصية دي معناها رفض تام للطريق بتاع ربنا

**ملخص السفر**

اللّٰه الذي يحبّنا محبة أبدية على الرغم من كثرة خطايانا

**هوشع و جومر ... و حال إسرائيل**

✚ إصحاح 1# لإصحاح 3#

ربنا بيشبّه خيانة شعبه ليه بزوجة خائنة

[تفاصيل أكثر](#)

**توبيخ و تحذير لإسرائيل**

✚ إصحاح 4# لإصحاح 11#

ربنا بيشرح خطايا شعبه الكثيرة (أسوأها عبادة الآلهة الغريبة) و ينذرهم بالعقاب ... لكن مع رجاء بالعودة

[تفاصيل أكثر](#)

**خلاص اللّٰه لشعبه**

✚ إصحاح 12# لإصحاح 14#

ربنا بيذكر من التاريخ إن الشعب ده كان بيرتد من ورائه دائماً رغم إنه كان أب مثالي ليهم .. لكن بحبه ليهم بيوعدهم بالشفاء إذا سمعوا و تابوا

[تفاصيل أكثر](#)



1: هوشع و جومر ... و حال إسرائيل



- ربنا قال لهوشع النبي يتجوز امرأة خاطئة اسمها جومر! (إصحاح 1، آية 2 و 3)
- بعد كده جومر أخطأت و زنت ثاني، بعد زواجها من هوشع، و بعد ما أنجبت منه 3 أبناء؛ ولدين و بنت (إصحاح 2، آية 5)
- بعد كده ربنا قال لهوشع حاجة غريبة جداً: قال له يروح يدور على جومر، و يدفع الديون اللي عليها و يرجعها ثاني و يحبها زي الأول (إصحاح 2، آية 14)
- بعد كده ربنا وضح إن ده كله رمز للعلاقة بين ربنا و بين شعبه إسرائيل:
 - الجواز = الخروج من أرض مصر، لقا ظهر لهم على جبل سيناء و أعطاهم عهده، و صاروا شعبه ... ساعتها ربنا أوصاهم بوضوح إنهم يعبدوه وحده و هو يكون معاهم ... ده العهد القديم
 - الخيانة = اللي عمله بني إسرائيل بعد ما ربنا أدخلهم أرض الموعد بالخير اللي فيها ... سابوا ربنا و عبدوا الأوثان و آلهة الشعوب اللي ربنا طردهم من قدامهم
 - طبعاً التصرف المتوقع بما إن الشعب خالف العهد إن ربنا كمان يترك الشعب إلى الأبد ... لكن ربنا ماعملش كده
 - تجديد العهد = ربنا اختار إن هو اللي يروح لبني إسرائيل ثاني و يحاول يجدد العهد معاهم ... و ده لأنه إله رحوم و أمين و عادل (إصحاح 2، آية 19 و 20)
- بعد كده هوشع قال نتيجة الخيانة المستمرة دي هاتكون في الآخر الهزيمة و السبي ... لكن فيه رجاء! لأن بعد كده هایتوبوا و يرجعوا لربنا ثاني ... و هايملك عليهم ملك زي داود يرجع لهم البركات و الخير ثاني (إصحاح 3، آية 4 و 5)
- إشارة للسيد المسيح طبعاً كملك على كنيسة العهد الجديد أعطاهم الغلبة و النصر

أول 3 إصحاحات فيهم ملخص لكل الأفكار اللي في السفر: شعب ربنا خان ربنا ... و ربنا هايعاقبهم بسبب خيانتهم المتكررة ... لكن رحمة و محبة ربنا

نتعلّم إيه؟

ربنا شبّه نفسه بتشبيهه صعب جداً: زوج وفي رائع يتعرّض لخيانة متكرّرة من الزوجة اللي كانت غلبانة جداً و مش لاقية حد يعطف عليها قبله (المعنى ده بيان جداً كمان في حزقيال 16) ... لكن ربنا يبقى أميناً معانا، يسعى إلينا لكي يردّنا ... كل ما علينا إننا نفتح قلوبنا و نتوب توبة حقيقية مستمرة

— يا رب إديني الرجاء ده فيك يا إلهي العظيم ... المحبة التي لا تسقط أبداً ... خلّيني دايماً أبص على محبتك و صليبك و أعرف إنك فاتح ذراعيك، مستنّيني أرجع و أتوب

2: توبيخ و تحذير لإسرائيل



من إصحاح 4 لإصحاح 10، هوشع بيتكلم عن أسباب خيانة إسرائيل، و نتائج الخيانة دي

1. **عدم المعرفة** ... و طبعاً هنا مش مقصود بالمعرفة مجرد معلومات ... المقصود هو المعرفة من خلال علاقة شخصية حقيقية (زي ما بنقول في المثل، إنك لو معاشرت شخص يبقى ماتعرفوش) (إصحاح 4، آية 6)
ربنا عايز شعبه يعرفه من خلال علاقة شخصية و اختبار حقيقي لحبه ليهم ... اختبار يغيّر و يشكّل حياتهم

2. **الرياء و النفاق** ... الناس كانت بتكسر الوصية و حياتها مليانة ظلم ... و في نفس الوقت بتقدّم ذبايح لربنا (ولا كأن فيه حاجة غلط المفروض يتوبوا عنها الأول). ... طبعاً ربنا مايرضاش ولا يقبل العبادة دي (إصحاح 4، آية 2 + إصحاح 5، آية 6)

3. **عبادات تانية** ... مش كده بس! ده كمان بيعبدوا آلهة غريبة مع ربنا! (إصحاح 4، آية 12 و 13)

4. **اتّكال على غير الرب** ... الاتّكال على مصر و آشور (إصحاح 7، آية 11)
بدل ما يثقوا إن ربنا هو اللي هايمهم، عايزين يكونوا زي الشعوب التانية و يتكلوا على قوّتهم و جيوشهم! و ربنا قال إن كل ده هاينقلب ضدّهم و إن آشور هاتقوم عليهم (إصحاح 9، آية 7)

• ربنا بيشبّه نفسه بأب طيب بيربّي ابنه و يعلمه المشي (إصحا 11, آية 3 و 4)

• لكن الابن لقّا كِبَر، انقلب على الأب و استغلّ عطاياه

• الأب غضب جداً من الخيانة و هايغاقب الابن ... لكن لسة هو ابن بالنسبة له ... ربنا برحمته و غفرانه كأنه قلبه وجعه و ندم على العقاب و هايعود و يتحنّن ثاني على شعبه (إصحا 11, آية 8)
و بالتالي بنفهم إن آه فيه عقاب و سبي من آشور، لكن برضه فيه رجاء بالعودة

نتعلّم إيه؟

لإزم نفحص نفسنا لأن ممكن جداً يكون عندنا واحدة من الخطايا دي أو أكثر بشكل أو بآخر ... و ربنا واضح جداً إنه لا يقبل الخطية ... و لو جالنا تأديب نفحص نفسنا على طول بدل ما نلوم ربنا ... و نثق إن التأديب ربنا هايشيله في الوقت المناسب

— 🙏 يا رب اختبرني و افحص قلبي و أفكاري ... و لو فيه حاجات عايزة تتطبّر، تدخّل بمشرطك أيها الطبيب الحقيقي ... حتى لو لم أفهم و توجّعت و تألمت و تذقّرت ... سأعرف و أفهم فيما بعد أنّه تأديب للخير حتى لا أهلك

3: خلاص الله لشعبه



في إصحا 12 و 13، هوشع بيشرح لهم من التاريخ أمثلة لعدم أمانتهم المستمرة

1. يعقوب جدّهم اللي تحايل على أبيه إسحق عشان ياخد بركة اليكورية ... طبعاً قبل ما يتوب و يُصبح إسرائيل الذي صارع الله و غلب (إصحا 12)

2. عبادتهم للعجل الذهبي عندما كان موسى يستلم الشريعة (إصحا 13, آية 2 و 6)

3. اختيارهم لملك مثل باقي الشعوب ... شاوّل الملك اللي رغم بدايته الكويّسة، عمل كوارث بعد كده (إصحا 13, آية 10 و 11)

إصحاح 14 بيرجع للرجاء ثاني

- في إصحاح 14، هوشع قال للشعب يتوبوا لكن هو كان عارف إن توبتهم بتكون قصيرة و مش مستمرة .. بيرتدّوا ثاني (إصحاح 14، آية 1 و 2)
- **بنشوف وعد رائع من ربنا إنه هيشفي إسرائيل من الارتداد ده، و هايحبّهم بلا سبب (إصحاح 14، آية 4)**
و ده أكيد ... عشان الأنانية و الكبرياء و الارتداد و الكسر و الخطية اللي بتكون متأصلة في قلب الإنسان تُشفى، لازم نعمة و قوة و شفاء من الطبيب الحقيقي، ربنا ... و ده اللي ربنا بيوعده به ... و ساعتها الإنسان هايقدر يشوف محبة ربنا ليه، و يحب ربنا في المقابل
- **و يشبّه إسرائيل بشجرة سوسن ضربت أصول قوية في الأرض و أخرجت فروع كثيرة بتقدّم الظل و الثمار لكل الأمم (إصحاح 14، آية 5 ل 7)**
ده زي وعد ربنا لإبراهيم إنه فيه تتبارك كل قبائل الأرض
- **يُختم السفر بآية فيها ملخّص أو تعليق على السفر: مين حكيم يفهم الكلام ده؟ البار هايفهم و يسلك، و المنافق هايرفض (إصحاح 14، آية 9)**
ده معناه إن الكلام صالح لكل العصور ... الله هو هو أمس و اليوم و إلى الأبد ... و الإنسان كمان هو هو على مدار الزمان ... و دائماً عنده اختيار يمشي في طريق ربنا أو بعيد عنه ... و بينما ربنا هايعاقب الخاطي اللي يرفض التوبة، ربنا دائماً يريد أن يشفي و ينقذ الإنسان من الهلاك

نتعلّم إيه؟

النهاية دائماً فيها رجاء ... رغم الخطايا و العيوب الكثير، ربنا بينقّي الإنسان برحمته و حكمته ... و يديله نعمة عظيمة جداً و يحوّله 180 درجة ... كل اللي علينا بس نثق فيه و نسلّمه قلوبنا و إرادتنا

— 🙏 يا إله المعجزات ... من غيّرت السامرية و العسّار ... خلّيني أجي لك واثق إنك هاتشتغل بي و تغيّرني و تقبلني يا أبي الطيب

أهم الآيات



آيات تلخّص السفر

أوّل ما كلّم الرب هوشع، قال الرب لهوشع: اذهب خذ لنفسك امرأة زنى و أولاد زنى، لأن الأرض قد زنت زنى تاركة الرب

— هوشع 1 : 2

- بداية صعبة جداً
- ساعتها كانت عبادة الأوثان منتشرة ... و طقوس العبادة دي فيها إباحية ... لذلك تفسير البعض إن جومر كانت وثنية
- زي ما الموضوع أكيد كان صعب جداً على نبي بار ... ما أصعبه على الله القدوس إن شعبه يزني وراء آلهة أخرى (عبادة إله آخر غير الله = خيانة لله)

فقال: إدع اسمه لوعميّ لأنكم لستم شعبي و أنا لا أكون لكم. لكن يكون عدد بني اسرائيل كرمّل البحر الذي لا يُكال و لا يُعدّ. و يكون عوضاً عن أنّ يُقال لهم: لستم شعبي، يقال لهم: أبناء الله الحي

— هوشع 1 : 9 و 10

- أسامي أبناء هوشع:
- 1. يزرعيل = زرع الله (بتفكرنا بآية: ما يزرعه الإنسان إياه يحصد أيضاً)
- 2. لورحامة = لا رحمة (بتفكرنا بآية: ليس رحمة لمن لم يفعل رحمة)
- 3. لوعمي = لستم شعبي (بيفهمنا إن إسرائيل في وقت من الأوقات خلاص مش هايكون شعب الله المختار ... بعدما رفضوا السيد المسيح و صلبوه) ... لكن الجماعة المؤمنين (التلاميذ و الرسل و من آمنوا بكلامهم) يتحقّق لهم النبوة اللي قيلت لأبونا إبراهيم إن نسله يكون في الكثرة مثل رمل البحر (أبنائه اللي لهم نفس إيمانه) ... و نعمة العهد الجديد إننا مش بس اسمنا شعب الله، بل أبنائه (بالتبني يسوع المسيح)
- الآية دي استخدمها القديس بطرس: 'الذين قبلاً لم تكونوا شعباً، و أما الآن فأنتم شعب الله. الذين كنتم غير مرحومين و أما الآن فمرحومون' (بطرس الأولى 2 : 10)

قد هلك شعبي من عدم المعرفة. لأنك أنت رفضت المعرفة أرفضك أنا حتى لا تكهن لي. و لأنك نسيت شريعة إلهك أنسى أنا أيضاً بتيك

— هوشع 4 : 6

- ❖ زي ما قلنا المعرفة هنا = العشرة و العلاقة الشخصية مع الله
- ❖ ربنا بيعاتب الشعب مش لأنه جاهل بل لأنه رفض المعرفة ... يعني رفض العهد و العلاقة مع ربنا
- ❖ طبعاً اللي بيعمل كده له عقاب و تأديب بهدف إنه يفوق و يرجع لربنا حتى لا يهلك

إني أريد رحمة لا ذبيحة، و معرفة الله أكثر من محرقات

— هوشع 6 : 6

- ❖ آية استخدمها ربنا يسوع
- ❖ المعنى = عدم الرياء
- ❖ يعني ماتبقاش حياتنا مليانة ظلم و خطية، و نيجي نقدم ذبيحة عادي جداً من غير توبة

خذوا معكم كلاماً و إرجعوا إلى الرب. قولوا له: إرفع كل إثم و إقبل حسناً، فنقدم عجول شفاها

— هوشع 14 : 2

- ❖ الموضوع لم يعد يحتاج لذبائح و مجهود عظيم ... بل الغفران بقى سهل و محتاج توبة بس
- ❖ عجول شفاها: تعبير جميل = ذبيحة التسبيح ... زي ما بنقول في مقدمة مجمع التسبحة: فلنصعد صلاتنا أمامك يا سيدنا مثل محرقات كباش و عجول سمان

أنا أشفي ارتدادهم. أحبهم فضلاً، لأن غضبي قد ارتد عنه

— هوشع 14 : 4

- ❖ فضلاً = من غير سبب ... هكذا أحب الله العالم
- ❖ و زي ما قلنا، ربنا هو الطبيب الحقيقي الوحيد اللي يقدر يشفي القلب الخاطي

تفسير بعض الآيات

و أخطبك لنفسي إلى الأبد و أخطبك لنفسي بالعدل و الحق و الإحسان و المراحم. أخطبك لنفسي بالأمانة فتعرفين الرب

— هوشع 2 : 19

- ❖ الآية دي استخدمها القديس بولس: 'لأني خطبتكم لرجل واحد، لأقدم عذراء عفيفة للمسيح' (كورنثوس الثانية 11 : 2)
- ❖ إلى الأبد: لأنها خطوبة روحية
- ❖ بالعدل و المراحم: على الصليب تحقق عدل و رحمة ربنا
- ❖ بالأمانة: أمانة عهد أبدي
- ❖ [تفاصيل أكثر في التأمل ده](#)

هلم نرجع إلى الرب لأنه هو افتّرس فيشفينا، ضرب فيجبرنا. يُحيينا بعد يومين في اليوم الثالث يُقيمنا فنحيا أمامه. لنعرف فلنتبّع لنعرف الرب. خروجه يقين كالفجر. يأتي إلينا كالمطر. كمطر متأخر يسقي الأرض

— هوشع 6 : 1 ل 3

- ❖ زي القطيع الذي ضل فافتّرس من الشيطان
- ❖ افتّرس فيشفينا: ده هدف ربنا ... التأديب مش الهلاك ... زي الطبيب اللي يجرح بمشرطه عشان يشفي
- ❖ ضرب فيجبرنا: سمح بالتجربة لتنقيتنا
- ❖ يحيينا بعد يومين في اليوم الثالث يُقيمنا فنحيا امامه: نبوة واضحة عن القيامة
- ❖ لنعرف فلنتبّع لنعرف الرب: اللي يفهم و يتبّع الكتاب هايعرف ربنا
- ❖ خروجه يقين كالفجر = القيامة اللي حصلت فجر يوم الأحد

- يأتي إلينا = التجسّد و المجيء الثاني
- كالقنطرة = عمل الروح القدس في النفس البشرية
- [تفاصيل أكثر في التأمل ده](#)

لَمَّا كَانَ إِسْرَائِيلُ غُلَامًا أَحْبَبْتَهُ، وَ مِنْ مِصْرَ دَعَوْتَ ابْنِي

— هوشع 11 : 1

- الآية حرفياً تعني خروج بني إسرائيل من أرض مصر
- ربنا بدأ عهده مع شعبه بحب عظيم و معجزة من أعظم المعجزات في التاريخ: الخروج من أرض مصر
- و طبعاً دي برضه نيوة عن مجيئ ربنا يسوع لأرض مصر

المراجع الرئيسية



- موقع [The Bible Project](#)
- وعظات أبونا داود لمعي من [برنامج فتشوا الكتب](#) أو من [المكتبة الصوتية على موقع كنيسة مارمرقس](#)
- موقع [القديس تكلهيمانوت](#)